

# Jaorverslag VVDS 2015-2016

## 2015-2016 was ut jaor van:

- Prins Gerrit d'n derde, oftewel Prins Bruul
- Jeugdprinses Juul d'n urste, Jeugdvorst Jarno en Jeugdarrin Britt
- Ut jaor van de legendarische uitsprake van de Prins
- Ut jaor van de neje vlag
- Ut jaor dat ut altied 's merges was
- Ut jaor van mit twië hand drinke
- Ut jaor wat zoë vurbej was
- Ut jaor van Ria van Gerwen
- Nog unne kier ut jaor van nog iiiiiene drinke, mar dan wel mit un fatsoenluk glèske

## Ut bestuur bestoond uut:

- Vurzitter Emiel Evers
- Vorst Jop Loonen
- Penningmèster Robert Steeghs
- Sik Rob Kunkeler (den nóg mier plat kan schrieve)
- En de bestuursleje . . . Freek Smulders - Han van de Sande en John Voermans

## De Raod van Elluf bestoond dit jaor uut:

Stef Claessens - Pascal Classens - Fred Peeters - Roel Steeghs, Marc Steeghs, Rowan Wijnhoven, Paul Geurts, Sander Peeters, Daan Willems, Marc van de Ven, Frank Steeghs, Wilbert Steeghs, William Steeghs

## 11-11

Gek genoeg begos ok dit jaor ut carnavalsseizoen wer op d'n 11<sup>e</sup> van d'n 11<sup>e</sup>, dit jaor viel dat op unne woensdag.

Prins Daan d'n urste en prinses Marloes moge nog un paar kier ien pak antreje. Mar vur dat zej ut seizoen echt ginge opene was ut urst tied vur iets nejs. Sommige han ut al gehuurd, sommige nie, mar ut was echt waar, de Spurriemök het vanaf nou Dansmarietjes! Nao un klène prizzentatie over wat wej mende dat die allemaol mosse kunne en mosse gaon doen was ut tied um bekend te make wie dit zun zien. En waar ze vanaf kwame was tot op ut lèst un verrassing, mar uiteindeluk stonde ze daar: Melanie van Mil, Merel Foeken en Rianne Loonen, dees 3 vrollie ware nog nie hiëlemol compleet, mar ut vierde dansmarietje was nou nog efkes prinses, nameluk Marloes Cox. Ien ur mojje dur Annemarie gemakte pekskes wier hun urst figuurluk ut hemd van ut lief gevraagd, en toen ze iënmaol beëdigd ware ginge we mit zien alle naor buute vur ut ienzègene van de Mök, en dit kier kwaam den d'r zellufs vrejwel ongeschonde vanaf.

Iënmaol binne was d'r vur de liefhebber un leuke quiz, waarbej ge most raoje wie d'r allemaol op de verbouwe en verkleurde foto's te zien ware. Uteindeluk bleke de Terpmökke de mèste meense te herkenne, en dees overwinning beloofde achteraf gezien veul vur de toekomst.

Dornao wier ut aovendvullende programma vurtgezet dur ut vurstelle van de neje raodsleje, mar liefst 6 stuks! Te wiëte: Wilbert, Frank, Marc, William, Han en Rob. De lèste twië kende we al langer van ut bestuur, mar gaon vanaf dit seizoen ien pak. En dit jaor ok unne primeur: Mit William is de urste herintrejer ien de raod van elluf un feit. Uiteraard zal Daan ok ien de raod komme, mar umdat den nog prins was moog den nou efkes nie mitdoen. Ien groepkes van twië wiere ze an de tand gevuld, en uiteindeluk iën vur iën beëdigd. Wej zien hartstikke blie dat os clubke mit dees jonge en ok zeker mit dees dansmariëkes is uitgebreid.

## Zaoterdag 14-11, ut Vorsteraodsbal

Dit jaor wier ut vorsteraodsbal gehalde ien ut jubilerende Hèdsbuuleriek ien de Hei. Waor ozze vorst vurrig jaor nog lekker op tied moog praote, mos hej dit jaor waachte tot de 11<sup>e</sup> plats. De speech ging d'r nie minder um, aldus de reacties achteraf. Volges ozze vurzitter top 3, mos ik zegge.

Vur de Câsselse vorst Dirk was dit un kierpunt ien zien lève. As ge ut fillemke op facebook gezien het wette waarom. Laote we zegge dat hej vort dur Venroj mot loëpe zoëas Geert Wilders dur de Schilderswijk, nameluk hiël snel en noëit alliën.

Op zonne aovend göt de raod van Oeldere flink an ut fiëste, en dan rakt d'r hiël duk wel iemes gewond, helaas was dat dizze kier iemes van os eige veriëning, nameluk ozze vorst Jop. Gelukkig dankzij de EHBO en 40 man die d'r umhin stoonde te kiek hong d'n enkel d'r nog an en was ut allemaol alliën un bitje blauw. Toen mos hej iederiën bejen roepe um te gaon, en gelukkig göt dat ok via whatsapp. Uteindeluk ware we moj op tied ien de bus, dit jaor zonder Câssele dus ok zonder gejatte bloemstukke.

### **Zaoterdag 28-11, 7x11 jubileumfiëst Rooy**

Waor wej mit de Spurriemök os al langzaam vurbereide op os 8x11 jubileum, mos de Piëlhaas uut Venroj urst hun 7x11 jubileum halde.

Wej wiere, net zoëas gebruukeluk, uitgenuëdigd op un fiëstlocatie, ien dit geval de alde Zenith, en, zoëas gebruukeluk ginge wej daor hin. En ok zoëas gebruukeluk was daor fiëst en muziek. Wat nie hiëlemol gebruukeluk was, was de 15 euro entree die ze daor vroege um binne te meuge, want eigeluk was ut 22,50, mar ze han os gematst.

Achteraf bleek dat ge vur die 15 euro wel alliën de B-artieste op ut binnepleintje kriegt, want ien de groëte zaal was ut zo druk dat unne compressor d'r jaloers op zeuj zien.

Verder hewwe os eige fiëstje gemakt, en op ut lèst zien we nog efkes gaon fiëste ien de groëte zaal. En wej zun de Spurriemök nie zien as we dornao ienèns wél plats zat han.

Verder ien ut kort: Han is nog efkes op de foto gewist mit unne dinosaurus mit un groëte kraag. En op un gegève moment hewwe ok nog efkes mit os Raodslid Mark geskyped, den zoot op Curaçao.

Uteindeluk wer naor huus, en wej ware, umdat iederiën te wers was um te reje, daorhin gegaon op de f..... en God Straft direkt, we kwame allemaol zeiknat thuus, zellefs de kels. Mar goed dat Sik Rob gen verstand van fietse het, want ondanks dat hej unne slappe band haaj is hej toch gewoën naor huus gefietst.

Nog un klène tip, as ge owwe jas an de binnekant van de graasdeur ophangt, motte de vollegende dag den nie van de buutekant uut ope make, anders kumt dr unne groëte winkelhaok ien en motte wer naor Annemarie, aldus ozze vurzitter.

### **..... - 12, Beton storte**

Bej Wout ien de schuur hebbe we ozze neje opslag, mar d'r mos nog wel urst hard gewerrekt werre.

### **Zondag 27-12, Prinsraoje en vlaggeverkoëp.**

Dizzen dag was wer ut jaorlukse prinsraoje, en os neje vlag wier uutgedèld. Ondertusse verschene d'r ien Oeldere ok links en rechts wat bordjes mit de vraog of d'r unne lierling wonde.

### **Iën wèk latter, zondag 3 jannewarie 2016**

De urste zondag van ut neje jaor, en d'n dag dat de prinsemuts gewisseld wert. Nao un woordje van Vorst Jop wier de proclamatie wer uitgereikt, en ok dit jaor was den kei moj. Dornao was ut natuurluk tied vur de lèste speech van Prins Daan d'n urste. En dat ging allemaol prima, mar op ut lèst... 99 van de 100 kels die dat gedaon han, kosse warschienluk un wèk nie zitte umdat hun

patroëntas te pien deuj, mar ien plats van un huweluk en un moj fiëst vur de raad, woï ozze prins d'r nog iiiiiiëne drinke mit zien Marloes. En de raad kreeg d'r ok unne natuurluk.

Nao dees schon weurd wiere zien versiersele afgenome en wiere zej opgenome bej de APK en de APK vur de vrollie.

Dornao naor de Liende, waar krek um 15.11 en un bietje de buhne ope ging. Daor was un moj klaslokaal te zien, mit un echt schólbord en alles derop en deran. Vorst Jop, vur dizze kier mèster Vorst, haaj un antal lierlinge uutgenuëdigd um hun kennis ovver Oeldere te laote teste. Helaas luusterde ze nie allemaol ève goed, en wier d'n iëne nao d'n andere deruut gestuurd. Ien de pauze ging hej efkes probiere of hej zellef bier kos brouwe, al wis iederiën natuurluk dat hej gewoën cola light bedoelde. Mar ut mislukte gruweluk, d'r kwaam an alle kante roëk uut, en snel wier 112 gebeld. De 11 regels vollegde, en nao regel 11 kwaam dwars dur ut scholbord unne schitterende brandweewage gereje, mit veurien Prins Gerrit d'n Derde. Iederiën was blie verrast, en al hiëlemol toen hej ziene Speech begos op zien Gerrits, oftewel mit: Goeiemorge Oeldere. Dornao kwaam nog un moj en leuk verhaal ovver dat hej un prinses haaj gezocht. Hej eindigde dan ok mit ziene liefspreuk: Un prinses heb ik dit jaor gen kunne viende, mar fiëste gaon we aevegoed, bej d'n Terp, en bej de Liende.

Nao unne groëte polonaise en de urste hëndjes schudde was ut tied vur de jeugd. Urst wier dur de vurzitter uitgeleet hoe ien groëte lijne de jeugdcarnaval d'r vanaf volgend jaor uut ging zien. Dornao ging vorst Jop es kieke hoe ut gesteld was mit de kennis van de jeugd ien Oeldere. Iedere kier as zej un goej antwoord han ginge der allerlei lichte brande an den brandweerauto. Nao un antal vraoge was ut tied vur de 11 regels, en vanuut un verborge ruimte ien de brandweewage kwame ze tevurschien: Jeugdprinses Juul d'n Urste, jeugdvorst Jarno en Jeugdarrin Britt. Nao hunne allerurste speech allemaol ien unne groëte polonaise ien de nek.

Toen de buhne wer leeg was is nog efkes de bouwcommissie van de prinseproclamasie ien ut zönneke gezet, aangezien die eigeluk altied achter de scherme staon. Ok dit jaor wer moj gedaon jonges.

Toen ut fiësjje enigszins op zien einde liep nog efkes naor de soos, en dornao us unne kier gen friet en frikandelle ien d'n terp, mar eier bej Prins Gerrit.

### **Rust wier os nie gegund, want wer iën wèk latter, 9 jannewarie..**

Ut ald wieverbal. Ut fiëst der fiëste ging dit jaor nie dur. Althans, daor het ozze vurzitter Emiel alles an gedaon, want vur ut urst ien 15 jaor kos hej d'r nie bej zien, umdat ziene baas ok un fiëst haaj. Helaas vur um mar gelukkig vur os ging ut toch dur. Uut mitlieje hebbe we nog mit de hiële zaal unne wave gedaon, den goed was gelukt, helaas ut fillemke nie.

En toen kwaam Prins Gerrit an ut woord, en kwaam dr un verhaal ovver dat ut un kort seizoen was, en dat de raad twië kier zo hard mos werke. Toen vollegde de urste legendarische uutspraak: As zillie twië kier zo hard motte werke, motte gillie coulant zien en ok twië kier zo hard drinke, oftewel mit twië hand. En ik kan ollie melde, dat is dizze vastelaovend ok geregeld vurgekemme.

De band Nightwind zurregde vur un goei fiëstje, en vur de rest was ut utzellefde verhaal as andere jaore, veul bier, veul lol, veul polonaises, veul danse, en vur un enkeling 's merges veul koppien. De pries van de groëte groepe ging dit jaor naor "Alles op de schup". Ok Gerrit ziene dubbelganger was anwezig. Zellefs Paula ging uut ur dak as roze batman, of zowiets. En William vuulde zich wer hiëlemol tuus ien de raad en mengde dan ok goed mit de rest van de jonge.

### **Wer iën wèk latter: 15 en 16 jannewarie..**

De bonte aovende. Dit jaor begosse we iets anders dan anders. Want we han natuurluk de dansmarietjes, en um mar us goed uut te legge hoe dat die audities han gedaon, vollegde d'r un live reconstructie. Den urste ronde betrof ut raodsleje vurstelle, dat dit jaor ok wat uitgebreider angepakt wier as vurrig jaor. De dansmarietjes begeleidde de jonge iën vur iën onder un moj stukske muziek naor de buhne, en dat dun ze hartstikke goed. Ronde twië was dans, en naodat we vastgesteld han dat zej dat bèter dun dan de jonge van de raad, was ut tied vur ronde 3 en wiere d'r binne 11 seconde pilskes gehald vur de meense op de buhne. Toen wiere de dansmarietjes ok wer mit mojje muziek vurgesteld, en krece ze uiteindeluk nog un mojje Spurriemökkemedaille opgespeld.

Dornao was ut tied vur un stukske dans van de Spotlights, en dat dun ze hartstikke goed.

Nao de dans kwame de jonge van Jeroensclan, en die liete os veule kante van zichzelf zien. Helaas han ze wel un treurige medediëling, nameluk dat Ria van Gerwen doëd was, terwiel dat vruuger nog zo'n jong ding waar.

Dornao was ut tied vur den buutreedner. Jan of Jan nie, ut mekt nie uut, Jan Peijnenborg haaj un moj verhaal over hoe hej urst unne kel was gewist.

Nao den buut tied vur un stukske muziek. De pianoboy's han un hiël biezondere manier van piano speule, mit twië vingers, zal ik mar zegge. Halleverwege was ut wat slajjes mar uiteindeluk toch mit un spetterend einde. Stan, Suraj en Frans, moj gedaon.

Dornao kwame dr wat alde bekende op de buhne, nameluk de hieren van Oeldere drèjt durrr. Zey vermieke Oeldere mit van allerlei waar gebeurde en gediëlteluk verzonnen verhalen uut de actualiteite. Dit jaor deuj d'n beamer ut gelukkig hartstikke goed. Moj gedaon dur Dennis, Han en William.

Toen was ut tied vur pauze, en kosse d'r wer lekkere brudjes gegète werre.

Nao de pauze kwaam de APK mit hun stuk: Alles blijft hier! Dees jonges verdedige Oeldere mit hand en tand tigge de Cásselse, en dat dun ze gelukkig mit veul humor. De hieren van de APK hebbe ok dit jaor wer un kei moj stuk op de plènk gezet!

Nao de APK kwame twië here die vurrig jaor ok same op de buhne han gestaon. Beck und Bauer zate klaor um iengezet te werre ien de WK-finale. Mit hunne humor hebbe John en Emiel ok wer un moj stuk nergezet.

Zoëas de lèste jaore gebruikeluk is ware de showdrums ok wer van de partij. Ieder jaor is ut wer un verrassing waar dees jonges op gaon houwe, en dit jaor ware ze de Painters die mit hun trapliere un hartstikke moj stuk ien mekaar hebbe gedrumd. Moj gedaon!

Os finale-act kwaam dit jaor wer van eige bojjem. Ze wiere vurgesteld as hoëg bezuuk, en as Willem-alexander en Maxima han ze wer un schitterend stuk. En dit jaor was d'r un jubileum: Vur de 11<sup>e</sup> kier stonde Marco en Peter same op de Bonte Aovend. Vrejdags wier dit beloond mit un böske bloeme, en zaoterdags krece ze un mojje collage van al hun acts, inclusief hun lèste.

Hartstikke moj gedaon jonges, en op naor ut vollegende jubileum.

Ut ware wer twië geslaagde aovende, mit vrejdags joekskapel 't sträotje' en zaoterdags os eige "de mök is los". Beide aovende koste tussendur ok nog geniete van un romanties gedichtje van vorst Jop.

**Woensdag 20 jannewarie** ginge we naor ut jaorlukse Circus Mök. En ge mot ut Venroj toch naogëve, ut is bèst knap um ut nog slechter te make dan vurrig jaor, mar ut is ze toch gelukt. Mit slechts twië goeie stukke vroege wej os eik af waarom we daor zoveul vur betald han. Os advies an Rooj: Óf bètere artiëste regele, óf de aovend vort Cirkus Ruk noeme... of meschien zellefs mit un F. Op ut fiëst dornao wiere natuurluk ok wer alle prinse naor baove gehald um ut Rooy's Prinsenummer mit te zinge, en zoëas ge kunt zien op de foto vond Gerrit dat geweldig...

### Vrejdag 22 jannewarie

Un extra uutstapje. Prins Gerrit is mit un mojje delegatie naor ut LVK gewist, en umdat we de vurrige kier zeiknat gerègend ware, wier d'r vervoer ien stijl geregeld.

Ien ut kort: Ut was groët, ut was goed, gezellig, en duur. En de pisbakke ware d'r misschien iets te wendig. Oftewel, vur 10 uur koste nog rustig gaon pisse, dornao moste, durdat d'r tapijttegels len, as ut waore ovver unne steeds grötter werrende ontsmettingsmat tigge unne waterval an zeike.

Verdere biezonderhede: Spik en Span han gewonne mit ut nummer: Ik kom nie ut Câssele.

### Zaoterdag 23 jannewarie

... was de jaorlukse krantverkoëp. Dit jaor hiëlemol anders: Klèndere advertenties, dus minder pagina's, en hiëlemol ien kleur. Hej is wel unne euro duurder geworre, mar toch zien d'r mier verkocht. Of zeuj dat komme umdat sommige meense an hiël iets anders dochte toen John ien zien prizzentatie zèj dat Marianne d'r hiël veul tiet ien haaj gestoke. Desalniettemin complimente vur de krantecommissie, want ut is unne kei mojje krant geworre!

Dornao was ut tied vur d'n aftrap van expedisie mök. Dit jaor wel mit unne fatsoenluke knal, zellufs zo èrg dat d'r un autoalarm af ging. De twië wèke van strijd was wer losgebarste. Wie zeuj dit jaor ut dukst de mök viende?

**Zondag 24 jannewarie, dus daags dernao**, was de receptie. Vriende, familie, de muziekveriëning, de APK, en nog veul mier meense stonde ien de rej um Prins Gerrit en ut Jeugdtrio un hëndje te gève. Zellufs d'n brouwer kwaam nog un cadeau uutreike an prins Gerrit. Alliën vraoge wej os af waarvur de C.V. stöt:

- Centrale Verwèrmig?
- Curriculum Vitae?
- Hebbe ze vest rèkening gehalde mit ut samegaon mit de bure en betèkent ut Câsselse Vèrkes en de Spurriemök?

Wej wiëte ut nie, mar dat is ok ga nie èrg. Ok was d'r de première van ut liedje van ut Jeugdtrio: Spurriemökke loëpe same.

Ut was unne mojje middag mit naoderhand nog un moj fiëstje. En we hebbe zellefs dornao wer eier gegète bej ozze prins.

### Zaoterdag 30 jannewarie... Oelderse kôst 2.0.

De 50+ers van Oeldere komme op dizze dag same um lekker te ète, te buurte en naor muziek te luustere, en ut was ok den ennigste kier dat Gerrit ziene speech begos mit "Goeiemorge", dat ut ok echt 's merges was! Dit jaor ien plats van brödjes frikandel en kroket: Soep van Paula en Boeremoes mit worst. Paula het unne hallevè dag patatte staon jasse, mar, zoëas Gerrit zej: "Truuj haaj anders toch niks te doen."

Ondertusse hielp Jos Loone as "Pierre Culinair" mit ien de bediening, en tot ieders groëte verrassing deuj hej ok nog unne mojje buut.

Wil Peters zurregde vur de muziek, en de dansmariekes en un antal raodsleje zurregde vur d'n drank. Al mit al was ut wer unne mojje middag den volgend jaor wer gewoën un vervolleg göt kriege.

### Den aovend...

Ginge we op verzuuk van Prins Gerrit naor ut knorrebal ien zien vroegere hometown Mèrsele. Gerrit haaj un Maasdalbus geregeld, en eigeluk mende wej dat dat tameluk overdrevè was. Wat wej nie wisse was dat hej zo onderhand hallef Oeldere haaj gevraogd um mit te gaon, dus dat d'r uuteindeluk ien die bus nog un man of 15 mosse gaon staon. Vol goeie zin kwame wej an ien Mèrsele waar wej ien iëne groëte polonaise de zaal èns zo vol mieke. We zage de meense achter de bar wit wegtrekke en snel wiere d'r groëte 50 literse vate bier gehald. De Band Sjanté zurregde vur un moj stukske muziek. Ut was un hartstikke gezellig fiëst, totdat de bus os wer op

kwaam hale. Ut schient dat ut dornao ok snel afgeloëpe was. Ien de bus kosse we nog geniete van de kaoje die we daar gekrege han, en den buschauffeur daags dernao dènk ik ok nog wel. Iënmaol angekomme vur d'n Terp bleek dat de mèste nog dorst han, dus nao de sprèkkoere van: "Gerrit mak de deur is Los" ging de deur ope, en as un stel hooligans störmde wej mit zien alle den Terp ien, waar ut tot ien de late uurtjes dur ging.

### **Zondag 31 jannewarie**

's Merges was d'r nie zo veul te belève, behalleve dat Prins Gerrit kort en bondig op de app zette dat hej zich "Kloëte" vuulde.

's Middags zien we nog naor de jeugdreceptie van Câssele gewist, mar bej nader ienzien was ut bericht van Gerrit nog interessanter dan wat we daar belèft hebbe.

's Aoves kwaam nog un hiële delegasie van Mèrsele (3 man) naor dn Terp umdat ze mende dat de resepsie den dag was.

### **Donderdag 4 fibbrewarie: SJMO-bal.**

Ok dit jaor was d'r un carnavalsbal van de SJMO, en zoëas gewoënluk was daar ok wer gewoën niks mis mit. Iën kiend is wel behuurluk hard mit ziene kop op de radiator gevalle. Gelukkig haaj den alliën unne bult, de radiator wier d'r nie wèrm of kald van.

### **Vrejdag 5 fibbrewarie: Schólbezuuk**

Dit jaor genne schóloptocht ien Oeldere, alles was op de Casselse manier. 's Merges begos ut al op tied ien de Wis. Un antal blokjes mit dans en stukskes, efkes wat ète, nog unne kier wat stukskes, iën of andere vlag hijse, wat speeches tussendur, en an ut end nog un Joekskapel die ut fiëstje moj afsloot.

### **Vrejdagaovend 5 fibbrewarie: Ziekebezuuk**

Umdat d'r gelukkig verder niemes ien ut ziekehuus of iets dergeluks lèj, is de vorst mit Prins Gerrit en Paula naor de bruur van Paula gewist, Nico. Den was ok nie echt ziek op dat moment, mar lèj wel al langer mit zien gezondheid te kwakkele. Daorum efkes op bezuuk, of volges Gerrit, en ik Citier: "Proficiat mit ow ziek zien". Verder bleek dat Gerrit daar den ennigste binne was den gratis rokte, oftewel den ennigste den der zellef gen sigaret ien de moond haaj.

### **Zaoterdag 6 fibbrewarie:**

Den dag begos ien de soos, waar ut jaorlukse Groët Vastelaoves ontbijt was. Daar wiere stiekem de urste pilskes gedronke.

Dornao ut klènste Mökske. Dit jaor ware Robert en Vera mit hunne Tigo de gelukkige. Efkes beschuut mit muuskes ète, unne medaille umhange en dornao ut klènste mökske ien de tuin zette. Umdat de grondboor unne kilomèter wiet weg stoond han we un probleem, mar Robert haaj zellufs un schup. Zoë te zien nog splinternej, ien d'n ollie, mar Prins Gerrit het efkes vur gedaon hoe ge d'r mit mot werke, onder de woorde: "En durrum heb ik dus genne tuin".

Dornao naor Venroj, de prinseinstallasie. Ut was unne lange zit, en toen we ozze prins vroege wat hej d'r van vond, zej den: Ut was hiël moj..... vur andere! Dornao nog efkes naor ut iensjekke op de groëte mert, en toen snel efkes tuus uustruste vur de mis. Ondertusse ware un paar leje van de band 's aoves gearrivierd ien... den Terp. Ze mende dat ut daar te doen was.

De mis was nie gek druk bezocht, mar ut huurt d'r toch bej. An ut end de jaorlukse speech van Vorst Jop, en toen mit zien alle naor ut Expedisie Mökkebal, waar alle vrollie van de raad vur de prins as prinses verklèd ware. Zoëas ge kunt zien het Wilbert ut ietskes bèter bekeke as William ierder ien ut verhaal. De opening was wer hartstikke moj mit ok wer mojje woorde van Prins Gerrit, nameluk: "Wej hebbe gen drankprobleem, as wej os gèr un stuk uut os kloëte zoepe motte we dat toch zeker zellef wiëte?" En zellefs Gerrit het zien hiële eige nummer gemaakt, en zellef ok nog gespuld ien un weergaloze solo, en zoëas unne echte rocker dat betaamt, flikkerde hej dornao zien (gelende) instrument op de grond naor de filistijne.

Dornao was ut tied vur un stukske muziek van Carnavalsband.nl. Ien de pauze was de priesuuttreiking van Expeditie Mök. En hoe kan ut ok anders, dit jaor han de extreem fanatieke Terpmökke, liefdevol dur de andere groepe de Terpmökkels genoemd, de bokaal binne geslept! De pries vur de mojste foto's ginge naor de Highweej Hunters. Nao dees uuttreiking was ut wer de beurt an de band, en zellufs die stonde dervan te kieke hoe moj ut Oelderse publiek an ut fiëste was. En as ut Oelderse publiek, en mit name de raod, göt fiëste, dan wil dr links of rechts welles iemes onderuut gaon. Dizze aovend was onder andere Paul Geurts de (on)gelukkige. Zien knej drèjde unne kant op waor den eigeluk nie op mos drèje en umdat hej daor toch wel un klèn bitje last van haaj het hej de rest van de aovend op un kruk gezète. Ozze prins viel ok, en haaj zich mit zien hand opgevange. Mar, unne bikkel as hej is, gewoën durgaon, en an ut end van den aovend nog ekkes eier ète.

### **Zondag 7 fibbrewarie...**

's Merges is Gerrit toch mar efkes naor dn dokter gewist umdat hej toch wel un klèn bitje pien an zien hand haaj, mar d'r bleek gelukkig niks an de... hand.

Roond de middag efkes mit un delegasie op bezuuk bej de moeder van Paula, die 93 geworre was. Lekkere vlaai mit koffie gehad, efkes wat foto's gemakt, en dornao dur mit de optocht ien Oeldere. De prins wonde op ut verzamelpunt, dus alliën naor ut huus van de jeugdprinses. Den optocht zellef was wer hartstikke moj, en ietskes langer as vurrig jaor. Dornao is de jeugd hiel efkes op flitsbezuuk gewist ien Geijstere, en toen was ut tied vur de priesuuttreiking en de opening. Ut jeugdtrio en de jeugdraod stonde moj op de buhne en ut trio moog hunne openingsspeech doen. Dornao unne groëte polonaise mit alle jeugd ien de nek. Ut kienderbal was gezellig mit DJ Flins en Ruud mit de lichtjesoptocht, en um 6 uur was d'r ien plats van brödjes vur de raod lekker wèrm ète ien de bestuurskamer. Dornao naor de soos, en vervolleges naor d'n Terp, waor ge goed kost zien dat ut daags dervur gezellig was gewist, want ut was vrej rustig.

### **Maondag 8 fibbrewarie**

Ut begos mit ut snotneuzebal. De allerklènste kiender mooge lekker fiëste, en op ut end viele natuurluk de ballonne uut ut net. Althans, dat was de bedoeling, mar umdat ut touw nie zo goed was gerege, haaj iën of andere handige Harrie d'r mar tie-wraps an geknöpt, want dan blijft ie zeker dicht... Das moj, mar nie de bedoeling op ut moment supreme. Gelukkig was Pascal mit zien kniep ien de buurt um de kiender wer blie te make.

Dornao naor Venroj vur den optocht... oh nieje, umdat d'r un paar wegwèjende blèdjes gespot ware wier den optocht ien Venroj afgelast vanwege de wiend. Wej, de prins én de raod, vonde dat zó èrg dat wej d'r tusse iën en vier uur allemaol slècht van geslaope hebbe. Uuteindeluk bleek ut dat we èvegoed de Piëlhazecup gewonne han. Wej hebbe durgegève dat ze dat ding wel mosse komme brenge want wej han genne tied mar vurral genne zin um dat ding op te hale.

Dornao kienderbal, waor dit jaor de kiender de baas ware, mit Rowan as prizzentator, en DJ Eleven, waarbej de 11 nie stoond vur ut antal verschillende nummers wat-ie gedrèjd het. 's Aoves ekkes naor de soos, en dornao naor d'n Terp, waor Prins Gerrit nog as töffeltennisnetje gefungierd het.

### **Dinsdag 8 fibbrewarie**

Net nao de middag is efkes un klène delegasie naor Eric Theunissen gewist, den was helaas gewond gerakt tiejes ozze mojje optocht. Hej kos ut bezuuk en de fruitschaal èrg wardiere. We begosse mit d'n brunch. Dit jaor haaj Paula hulp gehad, want ut blijkt dat Bart goed balle kan drèje. De brunch was dit jaor ok wer goed.

Dornao naor iën van de grötste fiëste van de vastelaovend, de BBZ. Dit jaor was ut nog drukker as andere jaore, en we krege ok nog bezuuk van de Zagewetters uut Mèrsele. Ut was wer un moj programma mit hiël veul verschillende artieste, teveul um op te noeme, mar wel iën biezondere, nameluk de familie van de prins, mit zellefs oma van 93 jaor op ut podium. De Zagewetters keke hun oëge uut. Naoderhand nog lekkere brödjes knak en hamburger. Dornao was ut alwer tied um de jeugdcarnaval baove af te sluite. Nao de speeches van ut jeugdtrio, waor d'r onder andere

gezeet wier dat ze nog wel un wèk dur won gaon, goof Prins Gerrit an dat hej ut daor mit èns was, en dat, as we dan gèr won, we dat zellef wel bepaalde of we dat dun of nie.

Toen ut ien de Liende afgeloëpe was naor d'n Terp, mar um 10 uur ging d'r un delegatie mit prins Gerrit naor de soos um de jeugdcarnaval vur dit jaor af te sluute. Nog iëne kier speeche, nog iëne kier mit zien alle op de foto, en de medaille ophange. En jeugdprinses Juul nagelde dat ding feilloos en kaarsrecht tigge ut bord ien de soos. Ik wiët nie waor zej dat technische talent van het, mar nie van ur vader, want Ruud het ut nog. Dornao de mök van de jeugd ien de fik, en was jeugdcarnaval 2016 vur de jeugd afgeloëpe.

Terug ien den Terp was ut fiëst al volop an de geng. Mar um hallef 12 wier ut tied um af te gaon sluute. Urst moge Gerrit en Paula naor veur komme. Ze zoote al 22 jaor ien d'n Terp, en han al 22 prinse verwelkomd, en ok al 22 jaor is de carnavalsveriëning welkom ien hun kroeg. Nao un woordje van vorst Jop wier hun un cadeau en teves andenke overhandigd as dank vur hun gastvrijheid.

Dornao moge John en Marion op ut biljart gaon zitte. Vorst Jop vertelde wat zej allemaol vur de veriëning han gedaon, mar vurral Marion vond ut fantastisch dat zej us unne kier ien de spotlight gezet wier. John kreeg de orde van de bronze Spurriemök mit Oerkonde, waor hej zichtbaar verierd mit was, en Marion kreeg un moj böske bloeme.

Toen was Prins Gerrit an de beurt. Hej bedankte un antal meense, bejvurbeeld Annemarie, die ut grei al gemakt haaj vurdat ut kapot was, den buurman Mies vur zien goeie hullep, en natuurluk ok de carnavalsveriëning. Hej woj gèr dat wej same d'r iiiiene zun drinke, alliën was dit wel un pilske van 7,5 liter. Naodat iederiën unne slok haaj genome en hoopte dat d'r niemes un kortslip haaj, ging hej verder mit ziene speech. En hoewel hej ut al hiël duk gezeet haaj, besloot hej nou mit: "Ik zal ollie 1 ding zegge: Ut was gewoën moj". En dur dees legendarische uutsprake is d'r niemes zo Gerrit as Gerrit.

Dornao naor buute, mök ien de fik, en was vastelaovend 2016 ok afgeloëpe. Uiteraard ging ut ien d'n Terp nog efkes dur, waor ut zoëas ieder jaor wer un dolle boel was.

### **Aswoensdag 9 fibbrewarie...**

Toen alles wer opgeruumd was ginge we ète bej Gerrit en Paula. Daor krege we unne groëte pot macaroni, waor ze nou nog steeds van an ut ète zien, en bloemkoëlsoep, die wel lekker was, mar as ze terugkwaam, nie mer zo... aldus ene P.G. te O.

Normaal gesproke was ut nou afgeloëpe, mar ien Rooj won ze gèr ter iere van de overwinning van de oelderse carnavalswage unne parade halde, en wel op de zondag nao de carnaval. Dus allemaol de Spurriemökkejas an en de gewoëne klier deronder, en mit d'n hiële handel naor Rooy.

Gelukkig was ut veul bèter wèr as carnavalsmondag, want ut wèjde vrejwel nie. Dat ut de ganse dag gesnejd het en kald was dat ut barstte han ze mar efkes vur lief genome. Mar uiteindeluk hebbe we dat wer allemaol overlèfd en was de vastelaovend toch echt hiëlemol compleet.

### **Dit was ut jaorverslag 2015-2016**